

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 38. Pravilnika o licencama ("Službeni glasnik BiH", broj 38/05), na sjednici Državne regulatorne komisije za električnu energiju, održanoj 28. juna 2007. godine, donijeta je

## **ODLUKA**

### **O IZDAVANJU LICENCE ZA DJELATNOST PRIJENOSA ELEKTRIČNE ENERGIJE**

1. Izdaje se licenca "Elektroprijenosu Bosne i Hercegovine", akcionarsko društvo Banja Luka za obavljanje djelatnosti prijenosa električne energije.
2. Licenca iz tačke 1. ove odluke izdaje se za period od 1. jula 2007. godine do 31. januara 2013. godine.
3. Sastavni dio licence su Uvjeti za korištenje licence za obavljanje djelatnosti prijenosa električne energije.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

### *Obrazloženje*

"Elektroprijenos Bosne i Hercegovine" akcionarsko društvo Banja Luka (u daljem tekstu: Kompanija) je formiran u skladu sa Zakonom o osnivanju kompanije za prijenos električne energije u Bosni i Hercegovini ("Službeni glasnik BiH", broj 35/04) i njegova djelatnost je prijenos električne energije i sve djelatnosti u vezi sa prijenosom električne energije, koje uključuju, ali se ne ograničavaju na prijenos električne energije, održavanje, izgradnju i proširenje elektroprijenosne mreže u Bosni i Hercegovini.

Kompanija je od 1. februara 2006. godine korisnik *privremene licence* za obavljanje djelatnosti prijenosa električne energije, registarski broj: 05-28-247-15/05 izdate na period od dvije godine. Ispunjavajući obavezu iz člana 38. stav 4. Pravilnika o licencama ("Službeni glasnik BiH", broj 38/05) da u roku od šest mjeseci od dana registracije u Registar pravnih lica BiH zatraži od DERK-a izdavanje licence kojom bi bila zamjenjena privremena licenca, Kompanija je u ovom smislu podnijela zahtjev pod brojem: 05-28-323/06 od 1. novembra 2006. godine. Zahtjev je podnjet na obrascima propisanim od strane DERK-a.

Shodno članu 7. Zakona o prijenosu, regulatoru i operatoru sistema električne enegije u Bosni i Hercegovini ("Službeni glasnik BiH", br. 7/02 i 13/03) za aktivnost prijenosa električne energije potrebna je licenca DERK-a a podnosilac zahtjeva je dužan zadovoljiti uvjete i kriterije za dobivanje licence koje svojim pravilima i propisima odredi DERK.

U skladu sa članom 8. Pravilnika o licencama DERK je podnijeti zahtjev utvrdio kompletnim pri tome uvaživši tvrdnju Kompanije broj: 04-2757/06 da će "Plan izgradnje novih i značajnije rekonstrukcije postojećih objekata za naredne tri godine" biti prigotavljen do kraja novembra 2006. godine i kao takav dostavljen DERK-u u nastavku postupka, kao i obavijest datu dopisom od 16. novembra 2006. godine o naknadno utvrđenom početnom bilansu kapitala Kompanije i prema kojoj se Kompanija obavezuje da izvrši odgovarajuće promjene podataka upisanih u registar.

Po pregledu i provjeri svih dokumenata u pogledu njihovih formalnih elemenata, DERK je pristupio razmatranju zahtjeva. Najprije je u skladu sa obavezom iz člana 10. Pravilnika o licencama, 14. decembra 2006. godine objavio u dnevnim novinama i na svojoj internet

stranici obavijest za javnost sumirajući zahtjev za licencu i odredio rok do 29. decembra 2006. godine za dostavljanje komentara javnosti na podnijeti zahtjev za izdavanje licence i dostavljanje zahtjeva za sticanje statusa umješaa.

DERK konstatuje da nisu dostavljani komentari u vezi podnijetog zahtjeva za dodjelu licence, niti je na javni poziv DERK-a bilo koje lice kandidovalo svoj interes da učestvuje u postupku u svojstvu umješaa.

DERK je izvršio provjeru podataka, dokumenata i informacija priloženih uz zahtjev i utvrdio da su isti tačni i potpuni, te da u svemu svjedoče o svim tehničkim, pravnim, finansijskim, organizacionim, kadrovskim i drugim mogućnostima, kapacitetima i sposobnostima podnosioca zahtjeva da ispuni sve kriterije, uvjete i standarde propisane zakonom i pravilima i propisima DERK-a za dodjelu licence. DERK je stoga pripremio Nacrt uvjeta za korištenje licence za obavljanje djelatnosti prijenosa električne energije.

Ovaj dokument je od 6. juna 2007. godine učinjen dostupnim podnosiocu zahtjeva, kao i svim drugim zainteresovanim članovima javnosti, a omogućena im je prilika da iznesu svoje komentare i na općoj raspravi održanoj 14. juna 2007. godine u sjedištu DERK-a u Tuzli. Na ovoj raspravi Kompanija je izložila komentare koji su naknadno razmotreni te je DERK, dopisom broj: 05-28-323-13/06 od 19. juna 2007. godine, podnosiocu zahtjeva dostavio Izvještaj sa održane opće javne rasprave i Prijedlog uvjeta za korištenje licence, u skladu sa članom 16. Pravilnika o licencama.

DERK je omogućio podnosiocu zahtjeva da i o ovim dokumentima ponudi svoje konačne komentare do 26. juna 2007. godine. Kompanija je svojim aktom broj: 01-3386/07 od 25. juna 2007. godine potvrdila da Prijedlog uvjeta za korištenje licence, kao sastavni dio ove odluke, uvažava većinu njenih komentara.

Na osnovu naprijed izloženog, odlučeno je kao u dispozitivu ove odluke.

U skladu sa članom 9.2 Zakona o prijenosu, regulatoru i operateru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-323-15/06

28. juna 2007. godine

Tuzla

Predsjedavajući Komisije

mr Vladimir DOKIĆ